

## ***Queda-te con Dios (L’anunzio á os pastors)***

**Chusé Antón SANTAMARÍA**

### **I**

#### **L’ánchel**

Pillar a zamarra,  
plantar-bos, pastors,  
un Dios tos aguarda  
que ye Salvador.  
O Dios de as plebidas  
nos promete en beras  
as pazes continas,  
rematar as guerras.

## II

### **O pastor (sondormido)**

Dixa-me dormir.  
¿A qué biens con istas?  
Dixa-me dormir.

¡Brinca-me d'aquí!  
¡Marcha, matután!  
No quiero guardians,  
dixa-me dormir.

## III

### **L'ánchel**

Marabiellas pasan,  
no tienen igual;  
fuera ixa galbana,  
te cal espertar.  
Biene-te-ne, que suenan  
mosicas e cantas  
e os ríos leban  
un mormor de nanas.

## IV

### **O pastor**

¡Aguarte, paxaro!  
Si me fas brincar...  
¡Aguarte, paxaro!

Menudos cotazos,  
ya puedes correr,  
no te ba á baler.  
¡Aguarte, paxaro!

**V**  
**L'ánchel**

Debanta sin miedo,  
da-le reberenzia  
á o naxito nuebo  
con toda inozenzia.  
Arrea escapau,  
leba-le un presén,  
yes afortunau  
por bier á o mozer.

**VI**  
**O pastor**

¿Afortunau dizes...?  
Siendo pastor... gota.  
¿Afortunau dizes...?

¡Qué cosas me pides!  
Creyer que un zagal  
tot lo ba á cambear.  
¿Afortunau dizes...?

**VII**  
**L'ánchel**

O demonio escapa,  
os ricos tortulan,  
os pobres alaban  
á ra criatura.  
Os infiernos reblan  
á Dios benzedor,  
que a gloria nos bienga  
d'ixe mozardón.

## VIII

### O pastor

¡Ai, si me dabanto!  
¡Serás macatrullo...!  
Ai, si me debanto!

Me tiens ya mui farto.  
Para cuenta tu...,  
cacho de mambrún.  
¡Ai, si me debanto!

## IX

### L'ánchel

Espabila os güellos,  
mira as luminarias  
e os zielos ubiertos,  
siente bien as cantas.  
Ixe Dios pudiente  
biene á esgallar fierros  
e con a man terne  
tancará os infiernos.

## X

### O pastor (espierto)

¡Alabau sía Dios  
¡Ánchels de o zielo!  
¡Alabau sía Dios!

Plega o Salvador,  
menuda algarada,  
o miedo m'engancha.  
¡Alabau sía Dios!

**XI**  
**L'ánchel**

Planta-te con garbo,  
abienta os melindres.  
Apura-te os pasos  
e no dandalíes.  
En a paridera,  
á man de o lugar,  
debaxo de a cueba,  
t'aguarda o zagal.

**XII**  
**O pastor**

Ixo no pue ser.  
¡Menudo embrollón!  
Ixo no pue ser.

¿Cómo ba á naxer  
en a paridera  
con tanta pudienzia?  
Ixo no pue ser.

**XIII**  
**L'ánchel**

Por ser tan umilde  
e porque nos quiere,  
as pallas esliche  
e a salbar-nos biene.  
Tu yes preferido,  
marcha antes con antes,  
mira fito fito,  
mira-lo, inorante.

**XIV**  
**O pastor**

Queda-te con Dios.  
Me'n boi abentau.  
Queda-te con Dios.

¡Si seré roñón...!  
Con a estrela entalto  
ya lo beigo claro.  
Queda-te con Dios.

**Chusé Antón SANTAMARÍA**